

§. XII. Interjura humana jus Gentium primastenet, quod alii hoc alii illo modo describunt uti videri possunt *Dd. ad §. 1. & 2. J. de J. N. G. & C. itemq; l. 1. & 2. de J. & J. Nobis placet cum Magnif. Domino Ziegl: in Not: ad Grot. loco superius cit: aliisq; Dd. distingvere inter jus Gentium Primarium & Secundarium. Ubi illud nobis coincidit atq; recurrit cum jure Naturæ secundario, quæcunq; ergo præcepta eo referri possunt, ea nos quoq; referimus ad jus Gentium primarium observatis unà iterum iis quæ de præceptorum affectionibus & adjuncto inseparabili diximus. Jus Gentium Secundarium autem & quod proprie jus Gentium dicitur illud dicimus: quod ab hominibus inventum est, mentis quadam agitatione comparatis inter se rebus excogitatum usu & necessitate exigente, adeoq; non tam rationis luce exortum ut primævū, illud, quæ ratiocinatoinis ductu collectū & usu exigente accommodatum non tam naturæ integræ bonitati, quam corruptæ necessitati. *Magnificus Dominus Ziegl. in not. ad Grot. p. m. 52.* inde jura belli, pacis, fæderum, captivitatum, servitutum itemq; contractuum ortum suum habuerunt §. 2. J. de J. N. G. C. Quod si tamen quæras de fundamento obligationis Juris Gentium non aliud forte quærendum quam quatenus hoc jus vel ad Naturale vel Civile referri potest. Quodcunq; ergo obligationem largitur præceptis Juris Naturæ vel Civilibus idem etiam pro diverso respectu Juri Gentium robur accommodabit.*

§. XIII. Jus Civile quatenus tale cuilibet reip. aut civitati proprium est arg. §. 1. J. de J. N. G. & C. habetq; vim obligandi ex superioris voluntate vel expressa vel tacita. Prius fit quando is qui summæ rerum præest expressa sanctione civibus suis jura præscribit. Illa jura seu leges versantur vel circa indifferentia vel circa jam jure naturæ aut divino præcepta aut prohibita. Si legibus suis Magistratus comprehendit ea, quæ jam jure divino vel Naturæ præcepta aut prohibita sunt, nihil quidem novum promulgat, cum & ante legem à se circa hæc atq; talia latam subditi iisdem obedire debeant, siq; contra fecerint puniri possint,